

Gyude Ɔwolɛ

¹ Me Gyude, Gyeemesi mɔ-tedɛ, ɔbono n gyɛ Yesu Kirisito gɛsun ɔwɔrabo mɔ ne n kya ηmarasɛ gɛnen ɔwolɛ baarɛ. N kya ηmarasɛ mi-i sa fɛye abono Wurubuaarɛ gi tɔgɛ sa fɛye yɛɛ fɛ' son mɔ mɔ. Fɛye-ilaa i bo aye-sɛ Wurubuaarɛ gisen dɔ, ne aye-Wura Yesu Kirisito kya kerɛ fɛye so. ² Wurubuaarɛ ɔ' yɛgɛ fɛ' nyɛ gitolon, gisen yuuli, de gɛlaarɛ' fɛ kya bɔla.

Asa Ako ME ηara Loo Fɛye Dɔ ME Kya Kyɛɛgɛ Yesu Ɔkalan Mɔ

³ Me-nanboana laarɛsɛ, Wurubuaarɛ gi mɔlɛgɛ me-rɛ fɛye pɛwu ne a kya nyɛ mɔ asɛ gɛkyena ɔnan. Nkana i bo me-gisen dɔ yɛɛ n' ηmarasɛ fɛye ɔwolɛ de n' tɔgɛ fɛye imɔ so ilaa. Nɛ san kerɛ mɔ, nɛ wu yɛɛ i kaaborɛ n' daa giηmarasɛ fɛye kyu lii ilaa banban iko so pɛi. I lii fɛɛ Wurubuaarɛ gi kyu ilaa nyiilesɛ ibono i kaaborɛ a' sɔɔ imɔ gyi mɔ wɔra aye, Yesu asonbo mɔ, abaa dɔ. Ɔ sa aye imɔ faa, ɔ sa aye daa. Ɔη baa kyɛɛgɛ imɔ. Imɔso n kya kolɛ fɛye, fɛ' wɔra aniya de fɛ' kerɛ imɔ so dɔɔdan de ɔko ɔη sa ɔ' kyɛɛgɛ imɔ. ⁴ I lii fɛɛ asa abono mɛη selɛ Wurubuaarɛ mɔ ako mɛ ηara loo saarɛ fɛye dɔ ibono fɛ mɛη nyi mɔmɔ so. Gɛnen asa abono mɛ de yɛɛ Wurubuaarɛ gitolon so mɔ, anyamesɛ mɛ laa nyɛ wɔra ilaayan. Gɛnen asa abono mɔ, mɛ kine Yesu Kirisito ɔbono mɔ-nkon ne n gyɛ aye-ɔbelɛnsɛ de aye-Wura mɔ. Lii ko-o dedaa mɔ, Wurubuaarɛ gi yɛgɛ ako mɛ ηmarasɛ asa abono ilaa yela yɛɛ ɔ laa biidɛ mɔmɔ-giso.

Fɛ' Nyingi Yɛɛ Wurubuaarɛ Kya Biidɛ Asa Nyɛnyɛn Giso

⁵ Ilaa ibono n kya laare n' baa tɔge nperɛ faa, fɛ ti wolaa fɛ nyi imɔ pɛwu. Nɛ taa kii mi-i nyingi fɛye daa. Fɛ nyi genɔɔbono Wura Wurubuaare gi mɔlegɛ Isirale awura ne mɛ koso Igyipiti gesinkpan so mɔ. ɔ mɔlegɛ mɔmɔ genen mɔ, imɔ gɛmara mɔ, mɔmɔ dɔ abono mɛɲ sɔɔ mɔ gyi mɔ, ɔ mɔɔ mɔmɔ. ⁶ Fɛ' nyingi Wurubuaare dɔ isɔɔ-lɛɛ mɔ kee. Mɔmɔ dɔ ako mɛ mɛɲ kyule de mɛ' sii de gɛbelɛnsɛ gɛbono ɔkara Wurubuaare gi sa mɔmɔ mɔ. Mɔmɔ gbaa-gbaa ne n taa mɔmɔ-ɔkyenaten ɔbono nkana mɛ wolaa mɛ tɛ mɔ yɛgɛ. Wurubuaare gi yɛgɛ ɔfɛ ɔbono ɔ maɲ tɛɛ gɛkaako mɔ gi ηminde genen Wurubuaare dɔ isɔɔ ibono kyu kpaa too wɔra gibiri dɔ tudɔ-tudɔ gɛtɛɛko. Nno ne mɛ san mɛ tɛ mɛ gyoo gɛkɛ gbaa' gɛbono ɔ laa biide mɔmɔ-giso kyu lii mɔmɔ-ilaa nyɛnyɛn ibono so mɔ. ⁷ Fɛ' nyingi Sodom mɔ-rɛ Gomora de isowolɛ sɛnsɛ ibono i sindi imɔ mɔ. Imɔ dɔ asa mɛ wɔra fɛɛ Wurubuaare dɔ isɔɔ ibono n dare faa lɛɛ mɔ ɔnan. Genen isowolɛ ibono so asa mɔ dare wɔra ilaayan dɛngɛ kpaa loo ibono iɲ gyɛ iwɔrase mɔ dɔ, ne Wurubuaare gi yɛgɛ ɔgya gi dɛɛ mɔmɔ-rɛ mɔmɔ-isowolɛ mɔ pɛwu faa ηonii. Mɔmɔ-ilaa idɛ i kya ka aye yɛɛ asa nyɛnyɛn mɛ laa kpe ɔgya ɔbono ɔɲ kya wu' gɛkaako mɔ dɔ.

Abonbo Mɔ Gidebi

⁸ Asa abono n dare yɛɛ mɛ ηara loo saare fɛye dɔ mɔ kee mɛ kya wɔra ilaa nyɛnyɛn ibono ɔnan asa akpen asa' adɛ mɛ wɔra mɔ. Mɛ kya tɔge yɛɛ i kya lɛɛ ilaa nyiile ɔmɔ de mɛ' yeɛ imɔ so wɔra ilaa nyɛnyɛn. Mɛ kya wɔra ilaayan kyu kyɔlesɛ mɔmɔ gbaa-gbaa nyoro gibi mɔ. Mɛ mɛɲ kya kyu abono mɛ kya gyi gɛbelɛnsɛ mɔmɔ so mɔ terɛ sɛi ne mɛ kya saalɛ ilaa ibono i kya nyɛ ɔlon anyamesɛ so mɔ. ⁹ Wurubuaare dɔ isɔɔ ɔbelɛnsɛ ɔbono mɛ kya terɛ mɔ yɛɛ Maakɛɛ mɔ gbaa mɛɲ saalɛ ilaa

ibono i kya nyε ɔlon anyamesε so mɔ. Owi ɔbono mɔ-rε ilaa nyenyen pɛwu gɛmu mɔ mε nyε gɛlɔgedε kyu lii Mosisi gibuni so mɔ, Maakelε mεη saalε mɔ. Ilaa ibono ɔ kpε tɔgε sa mɔ mɔ ne n gyε yεε, “Wura Wurubuaarε ɔ' gya fo yεε ilaa ibono fo dε faa iη boran.”

¹⁰ Asa abono n darε yεε mε ηara loo saarε fɛye dɔ mɔ, ilaa kamaasε ibono mεη kya nu gεsε mɔ, asebi ne mε kya kyu loo imɔ dɔ. Ilaa ibono mε kya nu imɔ gεsε gbaa mɔ, i mεη gyε yεε mε kya sa gεwɔnsa pɛi de mε' lɔɔ nu imɔ gεsε. I kya loo daa mɔmɔ-amu dɔ fεε nbuε-lεε ɔlaako ginyi ɔnan. Gɛnen ilaa ibonoana ne nan mɔɔ mɔmɔ.

¹¹ Asa abono berε, mɔmɔ laako. I lii fεε ilaa nyenyen ibono Keen gi naa kyena wɔra mɔ imɔ ɔnan ne mɔmɔ kee mε kya wɔra faa. Aterenbi gɛlaarε so mɔ, mε taa mɔmɔ-nyoro yεgε sa Baalam-lεε ilaa nyenyen giwɔra mɔ ɔnan. I yεgε mε fuε ɔkpa dɛnsε mɔ. Mε wɔra gisomaanu de Wurubuaarε fεε gɛnɔɔbono Kora gi naa kyena wɔra mɔ. Wurubuaarε laa mɔɔ mɔmɔ ka gikɔ fεε gɛnɔɔbono ɔ naa kyena mɔɔ Kora mɔ. ¹² Mε kya gyi fɛye-gɛnanbokon gɛkε belε agyudɔ kpaa fɛye mɔ, mε kya nyida daa ilaa sa fɛye ne mε kya wɔra fɛye ipeeli. Mɔmɔ berε mε mεη nyi ipeeli. Mε kya kerε daa mɔmɔ-nyoro wolε so. Mε dε fεε Wurubuaarε awolε abono a koola fεε nyangbon laa baa da ne afuu a kya da amɔ koso mɔ. Mε dε daa kee fεε iyii ibono iη kya sɔrɔ abi, dabɔlε imɔ-asɔrɔberε mɔ. I wɔra fεε gɛnen iyii ibono i wu' i yelε ne. I kaaborε mε' kyigi imɔ fuε de i' wu' ilɛwu inyɔ. Gɛnen ne asa adε mε laa wu' ilɛwu inyɔ kee ne. ¹³ Mε laa kpε ma-a wɔra ilaa nyenyen, de mɔmɔ-ipeeli ilaa i' lii gɛwi. I dε daa fεε gɛnɔɔbono afuu a kya da apoo ginyadon so, ne nkyu mɔ gi kya furu mɔ. Mε dε fεε agyεkpɛbi abono a naa Wurubuaarε awolε dɔ giyan-giyan mɔ. ɔko-rε ɔko marη taalε buu ɔmɔ de ɔ' bii ɔkpa dɛnsε mɔ. Wurubuaarε

gi lɔɔ nfono i tansi i bo gibiri kyikin mɔ yela sa mɔmɔ mɔmɔ-lɛwu gɛmara. Nno ne mɛ laa sii gɛkpa-a-gɛkpa-a.

¹⁴ Adedaabo abere dɔ mɔ Inɔki gi wu asa adɛ ilaa tɔge yela. Adam abere dɔ gɛmara mɔ asa abono mɛ kyena-kyena kyon mɔ gikpadɔ sonosɛ ne n wɔra Inɔki-lɛ abere dɔ. Inɔki baare gi wu tɔge yela yɛɛ, “Kere, Wura Wurubuaare kya ba mɔ-rɛ mɔ-isɔɔ sakpii bele abono ɔ lɔɔ yela sa mɔ-nyoro mɔ. ¹⁵ ɔ kya ba de ɔ' baa gyi nyamesɛ kamaase nbelɛ. ɔ laa bun abono mɛnɔ sele mɔ mɔ pɛwu gipueɛ. Mɔmɔ-ilaa wɔrase i kya lɛɛ nyiile yɛɛ mɛnɔ sele mɔ. Wurubuaare ilaa inɔ fɛ genen ilaa nyenyɛn awɔrabo adɛ giso. Mɛ saale mɔ asebi loose. ɔ laa biide mɔmɔ-giso kyu lii imɔ ide pɛwu so.”

¹⁶ Asa abono mɛ nara loo saare fɛye dɔ mɔ, owi kamaase mɔ mɛ kya nyɛ ilaa iko lɔgedɛ imɔ so, ne sei mɛnɔ kya gyi mɔmɔ-ginsi. Mɔmɔ-ɔbole gɛlaare ilaa ne n bo mɔmɔ-ansi so. Mɛ kya nyiile mɔmɔ-nyoro mɔmɔ-gɛtɔnge dɔ. Mɛ kya kyu genɔ ɔkon kyu tɔnge sa asa de mɛ' nyɛ ilaa lii mɔmɔ ase.

Fɛ' Keda Yesu-Lɛɛ ɔson Mɔ Dɔ

¹⁷ Me-nanboana laareɛ, fɛ' nyingi ilaa ibono aye-Wura Yesu Kirisito isɔɔ mɔ mɛ wolaa wu tɔge yela mɔ. ¹⁸ Mɛ tɔge sa fɛye yɛɛ, “Owi ɔbono gɛsɛ gɛrɛ i kya laare i' baa yela ɔkara mɔ, i laa nyɛ ako mɛ laa kyu Wurubuaare ilaa mɛ kya nmasɛ. Ilaa kpɛi-kpɛi ibono Wurubuaare kya kyo mɔ giwɔra ne nan gyi mɔmɔ-amu.” ¹⁹ Genen asa abono ne n kya yɛge gɛsabarage gɛ kya ba fɛye dɔ. I lii fɛɛ anyamesɛ-lɛɛ nwonso ne n bo mɔmɔ-amu dɔ. Inɔ gyɛ Wurubuaare Oduduu ne n bo mɔmɔ dɔ.

²⁰ Me-nanboana dɛnsɛ, fɛye berɛ, fɛ' bela fɛye-nyoro kyu naa de Yesu ɔkalan ɔbono Wurubuaare gbaa-gbaa gi sa aye yɛɛ a' sɔɔ gyi mɔ so. Fɛ kya dalaa mɔ, fɛ' dalaa Wurubuaare Oduduu mɔ ɔlon dɔ. ²¹ Fɛ' yɛge

fɛye-nwɔnsa gi' gyan' Wurubuaarɛ gɛlaarɛ' gɛbono ɔ bo sa fɛye mɔ so. Aye-Wura Yesu Kirisito bo gitolon sa fɛye. Imɔso fɛ' kyena gyoo gɛkaabono ɔ laa sa fɛye Wurubuaarɛ asɛ gɛkyena gɛkpaa mɔ. ²² Asa abono mɔmɔ-nwɔnsa dɔ i bo mɔmɔ tɛfɛɛ tɛfɛɛ kyu lii Yesu ɔkalan mɔ so mɔ, fɛ' su mɔmɔ gitolon. ²³ Asa ako mɛ kya wɔra ilaa ibono i laa yɛgɛ mɛ' kpaa loo ɔgya dɔ mɔmɔ-lɛwu gɛmara; fɛ' mɔlɛgɛ ɔmɔ! Ako, mɔ, ne fɛ laa su mɔmɔ-gitolon mɔ, fɛ' kerɛ fɛye-nyoro so dɔɔdan. Fɛ' kyo ilaa nyɛnyɛn ibono mɛ kya wɔra ne i kya kyɔlɛsɛ mɔmɔ fɛɛ akuru ne n wɔra ineesi mɔ de iŋ sa i' kyangɛ fɛye.

Fɛ' Yɛgɛ A' Yen Wurubuaarɛ

²⁴ Fɛ' yɛgɛ a' yen Wurubuaarɛ. Mɔ ne n gyɛ ɔbono ɔ laa taalɛ kpaa fɛye de fɛŋ sa fɛ' loo ilaa nyɛnyɛn giwɔra dɔ. Mɔ ne nan taalɛ yɛgɛ i maŋ nyɛ ilaa nyɛnyɛn iko fɛye-nyoro so baa pii, de o' kyu fɛye kpe mɔ asɛ mɔ-nyisigyɛ dɔ de ɔkon belɛ. ²⁵ Fɛ' yɛgɛ a' yen mɔ kyu naa de aye-Wura Yesu Kirisito so. Mɔ-nkon ne i kaaborɛ nyamesɛ ɔ' son. Mɔ ne n gyɛ aye-ɔmɔlɛgɛbo. Nyisigyɛ, gɛwुरagyɛ, ɔlon de gɛbelɛnsɛ i' wɔra Wurubuaarɛ-lɛɛ aberɛ abono a ti kyon mɔ, aberɛ adɛ dɔ, de aberɛ abono a laa baa ba mɔ dɔ gɛkpaa-gɛkpaa. I' ba gɛnen.

ḠḠḠḠ ḠḠḠḠḠ, ḠḠḠḠḠ ḠḠḠḠḠḠḠ ḠḠ ḠḠḠḠ ḠḠḠḠḠ
AnyamesḠ ḠḠ ḠḠḠḠ ḠḠḠḠ

The New Testament in the Gikyode language

copyright © 2020 Wycliffe Bible Translators, Inc.

Language: Gikyode

Contributor: Wycliffe Bible Translators, Inc.

All rights reserved.

2020-11-17

PDF generated using Haiola and XeLaTeX on 14 Jun 2022 from source files dated 30 Nov
2021

4cc402b4-139a-5f33-9af9-fbf62307f663